

Intervensaun maktaka S.E. Primeiru-Ministru Taur Matan Ruak nian iha ámbitu aprovasaun OJE 2021 nian iha final global

12 Dezembru 2020



Intervensaun ikus S.E. Primeiru-Ministru Taur Matan Ruak nian iha ámbitu aprovasaun OJE 2021 nian iha final global (transkirsaun)

Parlamentu Nasionál, loron 12 fulan-dezembru tinan 2020

Obrigadu Sr. Presidente Parlamentu Nasionál ba tempu

Señór distintos deputadu no Señora destintas deputada

Señór sira Memburu Governu nian

Komunidade sira

Povu rona na'ín

Iha tinan rua ho balun VIII Governu Konstitusionál halo orsamentu neen (6) hamutuk ho ida ne'e. ho aprovasaun orsamentu ida ne'e, ha'u fiar katak nia ajuda taka siklu ida no ajuda loke siklu foun, tanba Governu ida iha mandatu tinan 5 halo orsamentu dala lima de'it, ami metade mandatu halo tiha neen ona, entauha'u kontente loos tanba ho aprovasaun orsamentu ida ne'e (OJE 2021) ne'e bele loke siklu foun ida, siklu ida ke normaliza filafali ita-nia siklu orsamentu tinan-tinan, ne'e por um lado.

Por outro lado, mós fó kbiit mai ita para bele rekupera ita-nia ekonomia, depois de feitu KOVID ne'ebé akontese ke afeta maka'as loos ita-nia ekonomia no mós konsekuénsia hosi orsamentu duodesimal ne'ebé ita hala'o iha tinan hirak ne'e nia laran. Tanba ne'e mak ha'u hakarak lori VIII Governu Konstitusionál nia naran, agradese Parlamentu Nasionál, ba Nai Deputadu sira hotu ne'ebé ho pasiénsia ho dedikasaun tomak apoia paraké ohin ita aprova Orsamentu Jeral Estadu ba 2021.

Governu rezista preokupasaun hotu ne'ebé Nai Deputadu sira apresenta iha durante diskusaun, ami promete katak sira ne'ebé presija hadi'a, ami espera katak bele hariku filafali Orsamentu Jeral Estadu ba tinan oin (2022) paraké tempu ba tempu ita aprende ho ita nia esperiénsia, ho dezafiu sira ne'ebé iha hodi mellora nafatin para *por um lado* hadi'a ita-nia ekonomia, mas por outro lado bele garante sustentabilidade rekursu uitoan ne'ebé ita iha, liuliu rekursu finanseira. No último Governu promete halo esforso hotu para implementa orsamentu ida ne'e ho di'ak hodi atinji objetivu ne'ebé ita hotu hakarak, katak rekuperasaun ekónómika fó empregu ba ita-nia sidadaun sira no mós ajuda setór privadu hodi bele iha kbiit atu ajuda Governu para bele sustenta ita-nia dezenvolvimento. Ne'ebé Sr. Presidente parlamento Nasionál, ha'u hakarak lori VIII Governu nia naran agradese em partikulár ba Sr. Presidente ba pasiénsia tomak ne'ebé jere ita-nia debate iha loron hirak ne'e nia laran.

Ha'u lamenta ajénsia Partidu CNRT ninian durante ne'e (debate OJE 2021) tanba, loos iha política diferença iha, maibé diferença ida ne'e labele halo paraké ita retira ita-nia apoiu ba dezenvolvimento ita-nia nasaun nian. Ne'e desizaun sira-nian i Governu hakarak husu paraké kontinua nafatin fó sira-nia kontribuisaun dezenvolvimento ita-nia nasaun nian ho diferença saida de'it mak iha, importante mak ita hotu hamutuk para reunii ita-nia forsa no kbiit hodi dezenvolve ita-nia rain liuliu iha momento sira hanesan ne'e mak ita tenke hamutuk liu, liuliu iha momentu krize ne'e.

Tanba ne'e Sr. Presidente Parlamentu Nasionál, obrigadu barak i ha'u termina ha'u-nia intervensaun.

Obrigadu